

### Headlines

- 1 कश्मीर घाटी च त्र'ऊं संसदीय हल्के आस्तै औंदे लोकसभा चुनाएं च इक लख 13 ज्हार कश्मीरी विस्थापितें दा वोट पाने आस्तै पंजीकरण कीता गेदा ऐ।
- 2 चुनांऽ आयोग नै औंदे लोकसभा ते असेंबली चुनाएं आस्तै महत्व आहली जानकारी उपलब्ध करोआने ते निर्पक्ख चुनाएं ताई तक्क रक्खने आस्तै 6एं राज्यें च विशेष निगरान नियुक्त कीते न।
- 3 भारत नै अरूणाचल प्रदेश च किश थाहें दे नांऽ बदलने बारै चीन आस्सेआ बार-बार कीती गेदी कार्रवाई दी निंदेआ कीती ऐ।
- 4 सुरक्षाबलें बारामुला जिले दी सोपोर थाहा थमां आतंकवादिएं दे त्र'ऊं साथिं गी गिरफ्तार कीता ऐ ते उन्दे कब्जे थमां ऐतराज आहली सामग्री बरामद कीती ऐ।

<><><><><><>

### Migrant-Voters

औंदे लोकसभा चुनाएं तैहत कश्मीर घाटी च त्र'ऊं सीटें पर मतदान होआ करदा ऐ ते एहदे लेई 1 लख 13 ज्हार कश्मीरी पंडित विस्थापित पंजीकृत न। राहत ते अबादकारी मैहकमे दे आयुक्त अरविंद करवानी होरें आखेआ ऐ जे जम्मू-कश्मीर प्रशासन आस्सेआ जम्मू ते उधमपुर जिले दे कश्मीरी विस्थापितें लेई 3 थवां 14 अप्रैल बश्कार खास शिविर लाए जा'रदे न। उनें गलाया जे अजें तगर उंदे कश् इक लख 13 ज्हार पंजीकृत मतदाता न। चुनांऽ प्रक्रिया तैहत नमें सिरेआ तयार कीती गेदी मतदाता सूचिं गी खीरी रूप दिता जा रदा ऐ। उनें दस्सेआ जे घाटी च मतदान त्रै चरणें च होना ऐ, अनंतनाग च मतदान 7 मई गी होग, 13 मई गी श्रीनगर च मतदान होग ते बारामुला च 20 मई गी वोट पाए जाडन। उनें दस्सेआ जे विस्थापितें लेई 26 मतदान केंद्र कायम कीते गेदे न जिंदे चा 21 मतदान केंद्र जम्मू च, दिल्ली च 4 ते इक उधमपुर च कायम कीते गेदे न। विस्थापित मतदाता 2 तरीके राएं वोट पाई सकदे न। पैहला- ओहू एम. फार्म भरिए अपनी जानकारी पाइए खासतौर पर कायम मतदान केंद्रें च वोट पाई सकदे न ते दुआ विकल्प ऐ डाक राएं मतपत्र। एहदे लेई उनें गी फार्म 12-सी भरना होगा। अरविंद करवानी होरें कश्मीरी विस्थापितें गी खरी मती गिनतरी च वोट पाने लेई गलाया।

<><><><><><>

### ECI-Special

चुनांऽ आयोग नै औंदे लोकसभा ते विधानसभा चुनांऽ च आलोचनात्मक प्रतिक्रियाएं ते होरनें गतिविधिं पर तक्क रक्खने लेई 6 राज्यें च खास निगरान नियुक्त कीते न। इनें राज्यें च 7 करोड़ थवां मती अबादी आले राज्य पच्छिम बंगाल, उत्तर प्रदेश, महाराष्ट्र, बिहार, आंध्र प्रदेश ते ओडिशा शामिल न। आंध्र प्रदेश ते ओडिशा च कन्नो-कन्नो विधानसभा चुनांऽ बी होने न। एह निगरान खासतौर पर सुरक्षाबलें, कर्मियें ते वोटिंग मशीनें दी निगरानी करने आस्तै लाए गे न। एह निगरान खासतौर पर बन्ने आले इलाकें च चुनावी प्रक्रिया गी प्रभावित करी सकने आली गतिविधिं दी रोकथाम पर खास ध्यान देडन। निर्वाचन आयोग

नै आंध्र प्रदेश, कर्नाटक, तमिलनाडू, उत्तर प्रदेश ते ओडिशा च पैसे ते बल दे इस्तेमाल राएं चुनांऽ लडने गी रोकने आस्तै खास पर्यवेक्षक बी तैनात कीते ना।

<><><><><><>

### MCC-Reasi

रियासी दे जिला चुनांऽ अधिकारी विशेष महाजन होरें दस्सेआ ऐ जे जिले च चुनांऽ आचार संहिता गी पूरी चाल्ली लागू करने आस्तै चुनांऽ अमले पाससेआ सख्त गैई पुट्टिआं गेइयां ना। आंकडें सरबंधी निगरान दलें दे बक्ख-बक्ख ठिकानें दा दौरा लाने मगरा उनें दस्सेआ जे रियासी जिले च चुनांऽ आचार संहिता दा पूरा पालन होवा रदा ऐ ते चुनांऽ सरबंधी जानकारी मुहैया करोने ताई काल सेंटर चालू होई गे ना। उनें दस्सेआ।

<><><><><><>

### Young-Voters Kathua

युवा ते पैहली बारी मतदान करने आले मतदाताएं दी इक बड्डी सोच ऐ जे बेहतर सरकार चुनी जाई सकै। सरकारी महिला कॉलेज कठुआ दी पैहली बारी वोट पाने आलियें मतदाताएं आखेआ ऐ जे ओहू पैहली बारी मतदान करने लेई बड्डी मती उत्सुक ना। उनें आखेआ जे ओहू अच्छी सरकार लेई बेहतर मेदवार गी वोट देडन। उनें आखेआ।

<><><><><><>

### Nirmohi-Vote

पदमश्री प्रोफेसर शिवदत्त निरमोही होरें अज्ज उधमपुर जिले दे मतदाताएं गी बड्डी मती गिनतरी च मतदान करने ते चुनांऽ प्रक्रिया च शामिल होने दा आह्वान कीता ऐ। आकाशवाणी समाचार कन्ने गल्ल करदे होई प्रो. निरमोही होरें आखेआ।

<><><><><><>

### Go.-Udh

उधमपुर संसदीय हल्के दे महा निगरान धीरज कुमार ते पुलिस निगरान दलजीत सिंह होरें कल डी.सी दफतर परिसर च असिस्टेंट रिटर्निंग अफसरें, नोडल अधिकारियें, सेक्टर ते ज़ोनल मैजिस्ट्रेटें कन्नै चुनांऽ तयारियें दा जायजा लैने आस्तै इक तफसीली बैठक लाई। बैठक दौरान जिला चुनांऽ अधिकारी होरें मतदान केंद्रें च चुनांऽ सरबंधी बक्ख-बक्ख प्रबंधें दी तफसील दस्सी। महा निगरान गी इस मौके मतदान केंद्रें पर सुविधाएं, खर्चें दी निगरानी करने आले सीगें दे कम्मकाज ते सेक्टर ते जोनल सतह दे अधिकारियें दी ट्रेनिंग जनेह विषें बारै बी दस्सेआ दसाया गेआ।

<><><><><><>

### SVEEP-Udh.

उधमपुर जिला प्राधिकरण पाससेआ कल देवका घाट, मांड, टिक्करी, गोल मार्केट, कैंबल-डंगा ते नीली नाला थाहरें पर लोकसभा चुनांऽ आस्तै मतदाताएं गी जागरूक करने बारै कार्यक्रमें दा सरिस्ता कीता गेआ। एहू कार्यक्रम जिला चुनांऽ अधिकारी सलोनी राय हुंदी निगरानी च लाए गे। उप जिला चुनांऽ अधिकारी डॉ. अनिरुद्ध राय ते जिला चुनांऽ अधिकारी डॉ. प्रीती शर्मा होरें इस मौके औंदे चुनांऽ च बदी चढिये हिस्सा लैने आस्तै नमें ते महिला मतदाताएं गी चेचा अनुरोध कीता।

<><><><><><>

### MEA-AP

भारत नै चीन आस्सेआ भारत दे राज्य अरुणाचल प्रदेश दी केई थाहरें दे नां बदलने दी लगातार कार्रवाई दी निंदेआ कीती ऐ। विदेशी मामलें दे प्रवक्ता रंधीर जयसवाल होरें दस्सेआ जे लगातार मन-गढत नाएं कन्नै अरुणाचल प्रदेश दी असल सच्चाई बदली नेई सकदी ऐ। अरुणाचल प्रदेश म्हेशा थवां भारत दा अनत्रुट हिस्सा ऐ ते म्हेशां रौहगा। भारत दी एहू प्रतिक्रिया चीन दी

बार-बार नां बदलने आली कार्रवाई मगरा आई ऐ। कल विदेश मंत्री डॉक्टर एस. जयशंकर होरें आखेआ हा जे नां बदलने कन्नै कुसै बी चाल्ली दा कोई असर नेई हुंदा। उनें गलाया हा जे अरूणाचल प्रदेश भारत दा राज्य ऐ हा ऐ ते म्हेशां रौहगा।

<><><><><><>

### Arrest

जम्मू-कश्मीर पुलस नै सुरक्षा बलें कन्नै रलिए बारामुला जिले दे सोपोर इलाके थमां आतंकवादिणं लेई कम्म करने आले त्रै सहायकें गी गिरफ्तार कीता ऐ। पुलस अधिकारी मुजब सेना दी राश्ट्रीय राइफल्स, सी.आर.पी.एफ आस्सेआ फल मंडी थाहर सांझा नाका लाया ते दिक्खेआ जे त्रै संदिग्ध लोक मौके थवां नस्सने दी फिराक च हे। सौहगे सुरक्षाबलें उनेंगी फगड़ी लैता ते उंदे कब्जे थवां पस्तौल, मोबाइल फोन ते होर दुआ आपत्तिजनक समेयान बरामद होआ।

<><><><><><>

### Hideout-Poonch

सुरक्षाबलें पुंछ जिले दे मेंढर इलाके च इक आतंकी ठिकाने गी नष्ट कीता ऐ। सरकारी सूत्रें मुजब इक टकोदी सूह पर कार्रवाई करदे होई विशेष कार्रवाई दल एस.ओ.जी, केंद्रीय रिजर्व पुलस बल ते राश्ट्री राइफल्स दे जुआनें तवी ते अप्पर गुरसाई च सांझा अभियान चलाया। इस दौरान इक गुफा च बनाए गेदे आतंकी ठिकाने गी तबाह कीता गेआ ते उत्थुआं किश ढल्ले-कपड़े ते खाने दिआं चीजां बरामद कीतियां। उआं जिले च तलाशी अभियान जारी ऐ ते अजें तोड़ी कुसै गी गिरफ्तार नेई कीता गेआ ऐ।

<><><><><><>

### VKPDKG-Samba

गौरमैंट डिग्री कॉलेज विजयपुर च कल विद्यार्थिणं ते अमले गी भारत च चुनावं दियां किस्मां विशे पर इक लघु फिल्म दस्सी गेई। एहदा प्रदर्शन वोट का पर्व देश का गर्व ते मेरा पैहला वोट देश के लिए दे बैनर हेठ कीता गेआ। फिल्म राणं विद्यार्थिणं गी भारत च चुनावं दिणं किस्में ते वोट पाने दे महत्व बारै जानकारी दिती गेई। एन.एस.एस दे स्वयंसेविणं ते होरनें कॉलेजें दे विद्यार्थिणं बी इस फिल्म गी बड़े उत्साह कन्नै दिक्खेआं कार्यक्रम दा सरिस्ता कालेज दिआं प्रिंसीपल प्रो. वंधना गुप्ता हुंदी दिक्ख-रिक्ख च कीता गेआ।

<><><><><><>

### IAF-Trial

जम्मू-श्रीनगर राश्ट्रीय जरनैली सड़कें पर अनंतनाग जिले दी बिज-बिहाड़ा थाहरै साड्डे 3 किलोमीटर पट्टी पर भारती वायु सेना दे जहाज गी तोआरने ते डोआरी भरने दी परख कीती गेई। अधिकारिणं मुजब एह कार्रवाई तकरीबन अदी रातीं शुरू होई ते अज्ज बडुलै साड्डे 3 बजे सम्पन्न होई। इस पट्टी दा निर्माण कम्म 119 करोड़ रुपें दी लागत कन्नै सन 2020 च रम्भ होआ हा जेडा पिच्छले बरे पूरा होआ। आपातकाल च जहाज तोआरने आली एह पट्टी मुल्लै च नेई 13णं परियोजनाणं दा हिसा ऐ जिनेंगी भारती वायु सेना पास्सेआ केंद्री सड़क ट्रांसपोर्ट ते जरनैली शिडक मंत्रालय दे सहयोग कन्नै त्यार कीता जा'रदा ऐ। इनें पट्टिणं पर युद्ध जां कुदरती कुरोपी दौरान लडाकु ते दुए जहाजें गी बी तोआरेआ जाई सकदा ऐ।

<><><><><><>

### Election-EVMs-VVPAT

भारत च चुनावं आस्तै लम्में चिरेणं लेई बैलेट बॉक्स दा इस्तेमाल कीता जंदा रेया ऐ। उस्सलै लोक इलैक्ट्रानिक वोटिंग मशीन ते वी.वी-पैट बारै च जानदे बी नेई हे। उस्सलै लोक पर्चियें पर वोट दिंदे हे ते उनेंगी सीलबंद मतदान पेटिणं च पाई दिंदे हे। एहदे मगरा लम्मी ते थकाई देने आली मतगणना प्रक्रिया गी ह्थ कन्नै मुकम्मल कीता जंदा हा। इस पूरी प्रक्रिया च बड़े मते कागजें दा इस्तेमाल हुंदा हा ते समां बी बड़ा मता लग्गी जंदा हा। एहदे कन्नै गलती होने दी शैका बी बनी दी रौहंदी ही। किश खामियें दे बावजूद बैलेट बॉक्स प्रणाली केई दहाकें तगर इस्तेमाल च आनेया जंदा रेया, पर जियां-जियां मतदाताणं दी गिनतरी ते चुनावं सरबंधी चुनौतियां बदियां तां मती कारगर ते सुरक्षित मतदान प्रक्रिया दी लोड महसूस कीती गेई। 1990 दे दहाके दे अखीरै च भारत च इलैक्ट्रानिक वोटिंग मशीन दा इस्तेमाल शुरू होआ। एहदे कन्नै मतदान प्रक्रिया च क्रांतिकारी बदलाव होआ, कागज दी पर्चियें दा वोट देने आस्तै इस्तेमाल बंद होई गेआ ते मतदान प्रक्रिया सखल्ली ते असान होई गेई। छडा इक बटन दबाइए मतदाता असानी ते सुरक्षित ढंग्गै कन्नै अपनी पसंद दे मेदवार गी वोट देई सकदा ऐ।

<><><><><><>